



Komprimentu Disiplinar Dezafiu ba Instituisaun PNTL no F-FDTL

Mahein Nia Lian Nú. 71, 26 Fevereiru 2014



Relatoriu Fundasaun Mahein Nia Lian ne'e suporta husi povu Amerikanu liu husi Ajéncia Estadus Unidus ba Dezenvolvimentu Internasional (USAID) no Embaxada Finlandia iha Jakarta.

Visaun husi autor sira ne'ebé expresa iha publikasaun realtoriu sira ne'e la representa vizaun husi Ajéncia Estadus Unidus ba Dezenvolvimentu Internasional (USAID) no Embaxada Finlandia.



Website: www.fundasaunmahein.org

Kontiudu Sira

Intrudusaun	3
Metodolojia	3
Kazu Disiplinar husi PNTL-F-FDTL	4
a. PNTL no kazu indisciplinar	4
b. F-FDTL no kazu indisciplinar	6
Atuasaun Sivil Hasoru Elementu PNTL no F-FDTL	7
Konkluzau	8
Sumario no Rekomendasaun	8
Bibliografia	9

Komprimentu Disiplinar Dezafiu ba Instituisaun PNTL no F-FDTL

Forsa tenki “disiplina no ezemplu”, halibur Timor oan tomak la’os sai fali fatór sobu, hases no hadok ema, istoria hatudu kontrariu, kuantu mais imi loko an, mais ema hases-an ba imi, mais ema hatun imi, mais ema minimiza imi. (Taur Matan Ruak)¹

Introdusaun

Hahalok kona-bá PNTL no F-FDTL nian regula ona iha lei no regulamentu aplikavel sira seluk. Lei Organiku PNTL maka regula kona-bá karakteristiku PNTL, inklui Regulamentu Disiplina PNTL (RDP) maka orienta kona-bá PNTL nia disiplina. Hanesan relata ona iha artigu balun ne’ebé ko’alia kona-bá PNTL nia karakteristiku no disiplina. Lei RDP dehan, disiplina tenki Komprimentu ho rigor ba lei jeral no lei aplikaval seluk kona-bá PNTL.² Katak dever PNTL nia maka buka halo tuir lei no kumpri lolos kona-bá serbisu hirak ne’ebé determina ona ba nia kabas.

Kestaun seluk, Regulamentu Disiplina Militar (RMD) dehan, militar tenki komprimentu ninia kna’ar hotu-hotu, hamtauk direitu ema nian, hakruk ba autoridade hirarkia, sakrifika intrese pesoal ba diak interese kolektivu tuir konstituisaun no lei aplikavel seluk.³

Iha RDM artigu 4 mos koalia kona-bá “dever militar” ne’ebé maka respeita autoridade sivil sira, trata mos sira ho dalan konviniente, la pratika asaun ne’ebé maka la tuir moral publiku, no mos dignidade no onra militar.⁴ Disiplina militar maka sai lasu moral no obrigasaun atu komprimentu tuir prinsipu justisa.

Maske regulamentu klaru ona maibe oknum PNTL no F-FDTL seidak komprimentu didiak iha pratika serbisu hodi komete krime, halo violensia no atitude sira ne’ebé la iha disiplina.⁵ Ida ne’e bele kria hela odiu no vingansa iha joven sira nia hanoin, iha momentu ida ne’ebé sira frustradu tanba laiha serbisu, entaun aporveita oportunidade hodi baku militar sira iha fora de serbisu.⁶ Pior liu tan maka oknum F-FDTL sira konfronta malu iha komidade nia le’et, no lakohi hakruk ba malu.

Durante Fundasaun Mahein nia monitorizasaun ba instituisaun PNTL no F-FDTL, iha ona akontesimentu lubun ne’ebé ema sivil sira tenta atu oho, asaltu no halo agresan fiziku direktamente hasoru membru PNTL no F-FDTL sira. Tuir observasaun FM rekolla katak membru PNTL no F-FDTL balun mate ona tanba hetan oho husi ema deskuiñesidu.

Metodolojia

Relatoriu peskiza ne’e mai husi diskusaun sira iha ekipa peskiza Fundasaun Mahein (FM) nian ho metodu ne’ebé adopta maka *Security Sector Discussion* – SSD. Monitorizasaun

¹ Diskursu Presidenti Taur Matan Ruak iha Anivesariu Loron Transformasaun FALINTIL ba F-FDTL dala XIII.

² Dekretu Lei Nú. 13/2004. (2004. Juñu. 16). Regulamento Disciplinar da Policia Nacional de Timor-Leste.

³ Dekretu Lei Nú. 17/2006. (2006. Novembru. 8). Regulamento de Disciplina Militar.

⁴ Dekretu Lei Nú. 17/2006. (2006. Novembru. 8). Regulamento de Disciplina Militar. Artigu 4.

⁵ Dgx. (2014. Janeiro. 09). Komandu F-FDTL Sei Hasai Membru Faltador no Komete Krime. <http://www.jndiario.com/2014/01/09/komandu-f-ftdl-sei-hasai-membru-faltador-no-komete-krime/>

⁶ Guterres, Frey. (2014. Feveiru. 18). Asesor Kasa Militar GPR. Entrevista Pessoal.

kazu kona-bá sivil baku no oho membru PNTL no F-FDTL sira durante 2011 to'o 2013. Halo entrevista ho autoridade relavante. Inklui informasaun sira husi media nasional no internasional sira no relatoriu sira públika dahuluk tiha ona husi Governu no ONG nasional kona-bá violensia no krime husi oknum PNTL no F-FDTL sira komete ne'ebé públika dahuluk tiha ona.

Relatoriu ne'e atu análise kona-bá "tanbá sa maka ema sivil sira baku no oho membru PNTL no F-FDTL" no oinsa nia impaktu ba estabilidade nasional. Relatoriu ida ne'e koko atu esplika kauza no fatór sira ne'ebé bele kontribui violensia no krime hasoru autór siguransa, inklui prosesu aplikasaun disiplinar iha instituisaun PNTL no F-FDTL nia laran.

Kazu Disiplinar husi PNTL no F-FDTL

a. PNTL no kazu indisciplinar

Relatoriu husi organizasaun nasional sira Dezembru 2013, oknum Polisia Task Force baku Joven sira inklui Oknum F-FDTL na'in rua no Xefi Suku Akadiru Hun ne'ebé deskonfia oknum Task Force hirak ne'e ho kondisaun lanu.⁷

Iha Disritu Zumalai 14 Janeiru 2014, Ajenti PNTL ho inisial LP tara karau kulit ba señor Lucio Acau (idade 54) nia kakorok, obriga halai husi Suku Raimea to'o Sub-distritu Zumalai kuaze 15 metru. Hasai liafuan du'un (kasar) hasoru suku Loro Raimea, dehan katak Loro Raimea ne'e mesak naok ten deit maske ajenti nia karau ne'e la'os ema suku tomak maka nauk.⁸

Kazu seluk maka oknum PNTL Bobby Gonsalves husi Compañia Siguransa Pesoal (CSP), uza kilat tiru ninia namorada nia uma iha area Delta, Fomento iha 25 Janeiru 2014, ne'ebé halo komunidadade sira hakfodak no trauma.⁹

Kestaun ida ne'e, Komandante UEP, Superindenti Xefi Afonso dos Santos, dehan kualker membru PNTL iha unidade ne'ebé deit maka komete kazu infrasaun disiplinar tenki submete ba justisa. Tanba lei la fo dalan membru PNTL ida ne'ebé deit atu halo halo infrasaun disiplinar iha fatin ne'ebé deit no wainhira membru PNTL ida maka uza kilat fora da area serbisu ne'e viola ona lei.¹⁰

Relatoriu Asosiasaun HAK, Lian Direitus Umanus relata kazu konkreta balun 2013. Mensiona katak, ajenti polisia Eskuadra Aileu, kaptura joven na'in 4 iha 27 Abril 2013, halo agresaun fiziku, baku no tau kadeira nia ain hodi sama joven ida nia ain kukun no halo insulta hasoru vitima sira.¹¹ Iha Distritu Baucau ajenti polisia ida uza kilat tutun fai ema nia kanuruk kotuk to'o monu depois lori vitima ba husik iha ofisina polisia durante kalan ida tomak la iha informasaun klaru.¹²

⁷ Belun, atRes. (2013. Dezembru). Revista Situasaun Dezembru 2013.

⁸ Azu. (2014. Janeiru. 14). Mauluta: Mete problema Nain ba Hatan. Jornal Timor Post.

⁹ Flo. (2014. Janeiru. 29). Eskoltu PM Hetan Dezarma. Jornal Timor Post.

¹⁰ MJ6. (2014. Janeiru. 31). Kazu Oknum CSP Tama Ona Prosesu Justisa. Jornal Timor Post.

¹¹ Asosiasaun HAK. (2013. Maiu-Jullu). Faktus Informasaun Direitus Umanus Fulan Maiu-Jullu 2013. Lian Direitus Umanus.

¹² Asosiasaun HAK. (2013. Maiu-Jullu). Faktus Informasaun Direitus Umanus Fulan Maiu-Jullu 2013. Lian Direitus Umanus.

Kazu kona-bá indisciplinar PNTL, kuaze akontese fulan-fulan, balun konsege rekolla husi media, inklui organizasaun sosiedade sivil sira, no barak liu maka dala balun akontese maibe sai nonok no segredu. Iha relatoriu Belun mos revista kona-bá, oknum PNTL ne'ebé komete violensia no krime. Hanesan iha Janeiru 2013, Sub-distritu Dom Aleixo, oknum PNTL ida tiru kanek ema ho moras mental iha parte ain ho kuak tolu. Inklui fulan Feveiriu oknum Polisia BOP na'in 2 baku estudante medisina ida to'o ran.¹³

Kazu seluk, iha Dili, Janeiru 2013, oknum polisia ida hatais sivil halo ameasa fiziku no dada joven ida iha ninia uma laran ho problema privadu. Inklui akontese iha Sub-distritu Vera Cruz, oknum polisia mane ida ho kondisaun lanu rega tama gas air mata ba katuas ida nia matan laran no tuku tan nia oin.¹⁴

Relatoriu PDHJ nian informa katak, kazu violasaun ne'ebé PNTL sira komete aas iha 2013. Iha keisa kona-bá violasaun direitus umanus ne'ebé PNTL komete hamutuk 49. Inklui kazu polisia ho autoridade lokal kazu 2. Relatoiru ne'e mos relata liu tan katak kazu hira ne'e ho tipu maka kazu tuku, tebe no baku hamutuk 27 ne'ebé PDHJ prosesa hela. Violasaun seksual no abuzu seksual hamutuk 3, kapturasaun no detensaun arbiru laiha orientasaun hamutuk 9, tiru arbiru hamutuk 2.¹⁵

Maibe Diretúr Asosiasaun HAK, Manuel Monteiro dehan, krime no violensia ne'ebé komete husi oknum PNTL sira iha ona avalisaun diak kompara ho tinan 3 ba kotuk.¹⁶ Tanba durante polisia sira halo atuasaun tuir ona estandarte legal sira ne'ebé maka iha hodi la komete ba aktus violasaun grave ruma kompara ho kondisaun no situasaun iha fulan 3 (Maiu-Jullu) antes.¹⁷

Membru PNTL nafatin komete krime tanba problema sosial no pesoal, bele implika sira komete krime, no dezenvolvimentu infra-estrutura PNTL ne'ebé la'o kadi'ik hela. No mos ita hare fila fali ba komponente sira iha PNTL laran, balun remata SD, Veteranus, Eks POLRI no seluk tan.¹⁸ Inklui mos tanba kuiñesimentu ba lei no formasaun ne'ebé natón, aplikasaun lei ne'ebé ladun forte obriga membru PNTL sira lakon komprimentu ba lei no regulamentu disiplinlar.

Karik tinan-tinan maka akontese nafatin, entaun bele sai hanesan dezafiu ida ba dezenvolvimentu instituisaun PNTL nian. Maka dala ruma todan oituan atu reduz violensia ne'ebé maka membru PNTL sira komete.

Nune'e mos Komandante Departamentu Justisa PNTL, Superintendenti Xefe Carlos Jeronimo hatete prosesu membru PNTL nain 7 maka iha ona prosesu demisaun, relasiona ho kazu indisciplinar ne'ebé sira komete.¹⁹

¹³ Belun, atRes. (2013. Feveiriu). Revista Situasaun Fulan Janeiru-Feveiriu 2013.

¹⁴ Belun, atRes. (2013. Feveiriu). Revista Situasaun Janeiru-Feveiriu 2013.

¹⁵ Max. (2014. Janeiru. 24). Membru PNTL Barak Komete Violasaun Diretus Umanus. <http://www.diariutimorpost.tl/berita-856-membru-pntl-barak-komete-violasaun-diretus-umanus.html>

¹⁶ Monteiro, Manuel (2014. Janeiru. 30). Entrevista Pesoal.

¹⁷ Asosiasaun HAK. (2013. Outubru). Faktus Situasaun Direitus Umanus Agostu to'o Outubru 2013.

¹⁸ Monteiro, Manuel. (2014. Janeiru. 30). Entrevista Pesoal.

¹⁹ Sonia Ferreira. (2014. Janeiru. 28). Membru PNTL Nain 7 iha Prosesu Demisaun. Jornal STL.

b. F-FDTL no kazu indisciplinar

Iha inisiu Janeiru 2014 antes tama ba lora transformasaun FALINTIL ba F-FDTL nian. Membru F-FDTL husi Komponente Naval ataka lesuk joven (maun alin) na'in rua iha Bar Tower iha lora 24 Janeiru 2014.²⁰ Kestaun ida ne'e sai asuntu prinsipal iha diskursu Prezidenti Republika Taur Matan Ruak no Maijor Jeneral Lere Anan Timur iha aniversariu lora transformasaun FALINTIL ba F-FDTL ba dala XIII iha Kuartel Jeral Fatu Hada.

Diskursu Prezidenti Taur Matan Ruak dehan, F-FDTL tenki "sai simbolu ida no fatór ida" ba estabilidade no dezvoltamentu nasional, hadia an hodi servi povu no rai ida ne'e no tenki sai hanesan "ezemplu ba entidades tomak la'os baku malu ho povu, no sai fali inimigu povu".²¹ Reforsa liu tan iha diskursu Maijen Lere Anan Timur katak, atu sai forsa professional, tenki hatudu "maturidade disiplina", espirtu nasionalizmu no patriotizmu para garante kualidade Estadu no povu.²²

Regulamentu Disiplina Militar (RDM), nu'udar matan dalan ba membru F-FDTL wainhira hala'o ninia kna'ar lora-lora. F-FDTL tenki sai simbolu no ezemplu hodi hatudu maturidade disiplina para garante siguransa no dezvoltamentu Estadu bele la'o ba oin. Maibe orientasaun hirak ne'e seidak hatudu masimu iha pratika lora-lora. Atuasaun sala ho violensia no krime nafatin sai hahalok membru F-FDTL sira.

Kazu konkreta ne'ebé involve violensia no krime direktamente husi oknum F-FDTL maka deskreve iha kraik ne'e. Kazu infrasaun disiplinar ne'ebé membru F-FDTL komete, maka kazu neen inklui F-FDTL hasoru autoridade lokal kazu rua, tui relatoriu PDHJ tinan 2013 nian.²³

Nune'e mos iha relatoriu husi organizasaun nasional rejista kazu violensia no krime ne'ebé oknum F-FDTL komete durante tinan 2013. Fulan Janeiru, oknum F-FDTL ida baku mane ida iha nia uma iha Sub-distritu Maubise, tanba baku Xefi Suku. Feveiru, oknum F-FDTL mane ida halo ameasa fiziku ba joven mane ida bainhira joven mane ne'e karega laptop iha internet kafe.²⁴ Oknum F-FDTL mane ida hamutuk ho nia maluk joven grupu ida asaltu mane ida iha nia uma lora to'o nia ferik oan ne'ebé isin rua hare desmaia. Asaun ne'e akontese deskonfia katak vitima ne'e naok oknum F-FDTL nia ikan.²⁵

Iha fulan Jullu to'o Agustu 2013, oknum F-FDTL ida halo asaltu fiziku hasoru Komandante PNTL iha Distritu Bobonaro wainhira Komandante PNTL hasé nia, tanba la uza kapaseti no halo pasa revista ninia motor.²⁶ Kazu seluk fali maka, Dezemburu 2013, oknum F-FDTL ida baku loza na'in iha Kolmera to'o kanek no ran wainhira loza na'in lakohi hatun sasan folin.

²⁰ Alm. (2014. Janeiru. 30). Joven Rua Pankada Husi Elementu F-FDTL, PN husu Fo Sansaun Disiplinar. Jornal Diario.

²¹ Flo. (2014. Feveiru. 03). Onra ba FALINTIL. Jornal Timor Post.

²² Flo. (2014. Feveiru. 03). Onra ba FALINTIL. Jornal Timor Post.

²³ Max. (2014. Janeiru. 24). Membru PNTL Barak Komete Violasaun Diretus Umanus. <http://www.diariutimorpost.tl/berita-856-membru-pntl-barak-komete-violasaun-diretus-umanus.html>

²⁴ Belun, atRes. (2013. Jullu-Agostu). Revista Situasaun Fulan Janeiru-Feveiru 2013.

²⁵ Belun, atRes. (2013. Janeiru. Revista Situasaun Fulan Janeiru 2013.

²⁶ Belun, atRes. (2013. Jullu-Agostu). Revista Situasaun Fulan Jullu no Agostu 2013.

Inklui iha Distritu Oekuse, Oknum F-FDTL baku mane na'in rua no fetu ida wainhira sira soe foer iha rate leten familia F-FDTL nian.²⁷

Relasiona ho asaun indisiplinar ne'ebé dala balun oknum PNTL no F-FDTL hatudu, kria hela eransa moruk ida iha komidade nia le'et. Ema sivil sira ne'ebé senti la satisfas ba hahalok brutalizmu husu autór siguransa sira hahu iha rezistencia ka asaun kontra sira hodi halo atuasaun hasoru membru PNTL no F-FDTL sira wainhira sira pasa fereias ka fora husi serbisu.

Atuasaun Sivil Hasoru Elementu PNTL no F-FDTL

Hahu husi membru PNTL ida hetan oho husi grupu deskuiñesidu iha Suku Tashilin Sub-Distritu Zumalai, Distritu Covalima. Tuir kronolojia katak, Ajenti PNTL Augusto Paulo dos Santos husi Zumalai atu ba ninia uma, maibe iha dalan klaran matebian Augusto hare grupu ida baku hela joven ida, Augusto tun ba ajuda joven ne'e, maibe matebian ne'e hetan sona fali husi nia kabun, kakorok no hetan baku husi besi kanu.²⁸ Kazu seluk maka ema deskuiñesidu asaltu no ta'a kanek Sarjentu Armindo iha 29 Dezembru 2013 iha Baucau Sub-distritu Baguia.²⁹

Nune'e mos membru F-FDTL balun ne'ebé hetan oho husi ema deskuiñesidu. Kazu konkreta membru F-FDTL ida ho naran Sabino Ximenes ne'ebé hetan oho husi ema deskuiñesidu wainhira fila husi Matinaro no mate isin soe iha tasi ibun Metiaut iha Novembru 2011. Kazu hanesan akontese ba membru F-FDTL Damião Soares ne'ebé oho husi ninia fen maibe diskonfia hetan ajuda husi ninia alin mane iha dia 25 Novembru 2011, oras tuku 10:00 kalan iha Suku Comoro, Sub-Distritu Dom Aleixo, Dili. Membru F-FDTL ho naran Sebastião Borges Marques mos hetan oho husi ema deskuiñesidu iha Sub-Distritu Maliana, iha 24 juñu 2012.

Akontesimentu ikus iha Domingu dader dia 12 Agostu 2012 maizumenus tuku 04:00 dadersan madrugada, ema deskuiñesidu halo agresaun fiziku hasoru membru F-FDTL Alferes ida ho naran Cristovão da Silva "Kiki Lai". Ne'ebé rezulta vitima hakotu i'is iha loron 20 fulan Agostu 2012 tuku 07:00 dadersan iha Hospital Nasional Guido Valadares (HNGV), Bidau, Dili.

Tuir monitorizasaun FM katak, kazu krime hirak ne'e balun hetan ona suspeitu no submete ona ba prizaun maibe balun seidak. Suspeitu ne'ebé oho membru F-FDTL Sebastião Gomes iha Maliana agora dadaun iha ona prizaun preventiva. Inklui kazu fen oho la'en mos iha ona prizaun preventiva maibe alin husi fetu ne'ebé diskonfia hamutuk oho membru F-FDTL Damião Soares to'o agora polisia investigasaun buka seidak hetan.

Kazu ne'ebé maka seidak hetan suspeitu, no sei iha prosesu investigasaun laran maka hanesan kazu iha Metiaut tinan 2011. Relasiona ho kazu ne'e tuir Superintendente Calistro Gonzaga katak, kazu refere hanesan todan oituan ba sira tanba wainhira hala'o prosesu

²⁷ Belun, atRes. (2013. Dezembru). Revista Situasaun Fulan Dezembru 2013.

²⁸ CJITL. (2011. Agostu. 16). Konfrontasaun Iha Zumalai Rezulta PNTL 1 Mate no Joven 1 KanekTodan <http://cjitl.org/cjittimor-today/cjittl-breaking-news/709-konfrontasaun-ih-zumalai-rezulta-pntl-1-mate-no-joven-1-kanektodan>

²⁹ Fundasaun Mahein. (2014. Janeiru.09). Up-date Siguransa iha Timor-Leste: Tentativa Estabilidade Nasional Hahu 2014. <http://www.fundasaunmahein.org/2014/01/09/up-date-siguransa-ih-timor-leste-tentativa-estabilidade-nasional-hahu-2014/>

investigasaun sira lakonsege hetan ligasaun la'ó fatin (rute), matebian mai husi Dare (hela fatin) ba Kuartel Tasi Tolu no mate isin hetan fali iha Metiaut.

Nune'e mos kazu hamate Alferes Cristovão Borges Marques iha Santa Cruz mos sei prosesu investigasaun nia laran no seidauk hatene se maka involve iha krime. Komandante Serbisu Investigasaun Kriminal (SIK) hatete katak sira foin maka halo investigasaun tanba durante akontesimentu seidauk iha ema ruma maka halo keixa ba polisia eskuadra no distritu. Tuir kronolojia comunidade Aldeia Murak halo festa koremetan iha Sabadu 11 Agostu 2012, iha festa ne'e membru F-FDTL mos iha ne'eba no hemu hela tua no kolega balun iha uma laran depois Cristovão fila ba hare familia sira iha Kaikoli. Iha tuku 04:00 madrugada joven husi Quintal Boot ba taka festa iha eis Xefe Aldeia Martinho Cozmiro maka telefone ba Cristovão atu mai hakalma konfrontasaun ne'ebé maka akontese maibe seidauk hatene los Cristovão ne'e hetan baku ka tuda husi grupu ne'ebé.

Konkluzau

Hahalok membru PNTL nian maka regula ona iha Regulamentu Disiplinar PNTL (RDP) no F-FDTL nian hahalok maka regula ona iha Regulamentu Disiplinar Militar (RDM). Regulamentu RDP no RDM maka regula membru PNTL no F-FDTL inklui lei aplikavel sira seluk. Maibe iha kazu hirak ne'ebé sita iha relatoriu ne'e nia laran, oknum PNTL no F-FDTL hatudu hahalok ses husi orientasaun lei no regulamentu nia haruka.

Oknum PNTL no F-FDTL dala balun hatudu karakteristiku brutalizmu iha fatin públiku. Atetude sira ne'e maka hanesan oknum PNTL no F-FDTL baku comunidade balun no hatudu hahalok indisciplinar iha Bairu sira no fatin divertimentu nian hanesan Bar.

FM nia preokupasaun sosiedade sei lakon konfiansa ba instituisaun PNTL no F-FDTL tan husi atitude sira ne'ebé la iha disiplina husi elementu instituisaun rua ne'e nian. Ida ne'e nu'udar kauza ida hodi hamosu resistensia husi comunidade hasoru elementu PNTL no F-FDTL sira. Iha ne'ebé FM nia monitorizasaun hare katak elementu PNTL F-FDTL sira hetan baku no oho husi comunidade tanba atitude sira ne'ebé la respeitu comunidade.

Sumariu Rekomendasaun

1. Rekomenda ba Ministriu Defeza no Siguransa liu husi Sekretaria Estadu Defeza no Siguransa hamosu kontrolu política ida ne'ebé efikasia ba dezvoltimentu iha instituisaun F-FDTL partikularmente iha area rekursu umanu, nune'e bele reforma mentalidade membru sira.
2. Rekomenda ba Komandu PNTL no F-FDTL hametin aplikasaun lei disiplinar nian no aplika prosesu disiplinar seriu ba elementu PNTL no F-FDTL sira ne'ebé komete infrasaun disiplinar.

Bibliografia

- Asosiasaun HAK. (2013. Outubru). Faktus Situasaun Direitus Umanus Agostu – Outubru 2013.
- Azu. (2014. Janeiro. 14). Mauluta: Mete problema Nain ba Hatan. Jornal Timor Post.
- Alm. (2014. Janeiro. 30). Joven Rua Pankada Husi Elementu F-FDTL, PN husu Fo Sansaun Disiplinar. Jornal Diario.
- Belun, atRes. (2013. Fevereiro). Revista Situasaun Fulan Janeiro-Fevereiro 2013.
- Belun, atRes. (2013. Jullu-Agostu). Revista Situasaun Fulan Jullu-Agostu 2013.
- Belun, atRes. (2013. Dezembru). Revista Situasaun Dezembru 2013.
- CJITL. (2011. Agostu. 16). Konfrontasaun Iha Zumalai Rezulta PNTL 1 Mate no Joven 1 KanekTodan <http://cjitl.org/cjittimor-today/cjitl-breaking-news/709-konfrontasaun-ihazumalai-rezulta-pntl-1-mate-no-joven-1-kanektodan>
- Diario Online (2013. Outubru. 07). Membru F-FDTL 175 Entrega Atributu Arte Marsiais. www.indiario.com/2013/10/07/membru-f-ftdl-175-entrega-atributu-arte-marsiais/
- Dekretu Lei Nú. 13/2004. (2004. Juñu. 16). Regulamento Disciplinar da Policia Nacional de Timor-Leste.
- Dekretu Lei Nú 09/2009. (2009. Fevereiro. 18). Lei Organika PNTL.
- Dgx. (2014. Janeiro. 09). Komandu F-FDTL Sei Hasai Membru Faltador no Komete Krime. <http://www.indiario.com/2014/01/09/komandu-f-ftdl-sei-hasai-membru-faltador-no-komete-krime/>
- Dekretu Lei Nú. 17/2006. (2006. Novembru. 8). Regulamento de Disciplina Militar.
- Do Rego, Claudio. (2014. Fevereiro. 12). Entrevista Pesoal.
- Fereira, Sonia (2014. Janeiro. 16). Membru PNTL 801, Entrega Atributu Arte-Marsiais. <http://jornal.suara-timor-lorosae.com/membru-pntl-801-entrega-atributu-arte-marsiais/>
- Fundasaun Mahein. (2014. Janeiro.09). Up-date Siguransa iha Timor-Leste: Tentativa Estabilidade Nasional Hahu 2014. <http://www.fundasaunmahein.org/2014/01/09/update-siguransa-ihator-lorostae.com/membru-pntl-801-entrega-atributu-arte-marsiais/>
- Flo. (2014. Fevereiro. 03). Onra ba FALINTIL. Jornal Timor Post.
- Guterres, Frey. (2014. Fevereiro. 18). Asesor Kasa Militar GPR. Entrevista Pessoal.
- Flo. (2014. Janeiro. 29). Eskoltu PM Hetan Dezarma. Jornal Timor Post.

MJ6. (2014. Janeiro. 31). Kazu Oknum CSP Tama Ona Prosesu Justisa. Jornal Timor Post.

Monteiro, Amandio. (2014. Fevereiro. 11). Intevista Pesoal.

Monteiro, Manuel (2014. Janeiro. 30). Intevista Pesoal.

Max. (2014. Janeiro. 24). Membro PNTL Barak Komete Violaun Diretus Umanus. <http://www.diariutimorpost.tl/berita-856-membro-pntl-barak-komete-violaun-diretus-umanus.html>

Rezolusaun do Governu Nú 16/2013. (2013. Jullu. 10). Exinção de Grupos de Artes Marciais.

RDTL (2011) Kontituisaun RDTL Parte V. Defeza no Siguransa Nasaun Nian. Artigu 146 no 147.

Sonia Ferreira. (2014. Janeiro. 28). Membro PNTL Nain 7 iha Prosesu Demisaun. Jornal STL.